



Selasa, 18 Mei 2022

Ogen: Efesus 5:15-17



"Pergunakalah Kesempatan"



Sekalok penulis terkenal rusaha mereken pengertin waktu/kesempatan man banta nina; adi perlu kita meteh kai ertina sada tahun, sungkunlah kalak si tinggal kelas. Adi perlu kita meteh kai ertina sada bulan, sungkun man sekalok nande si nimai paksa mupus entah enggo lewat bulanna mupus, adi perlu kita meteh erti i minggu, sungkun wartawan si ngayak-ngayak tulisen masuk, sebab lit date line tulisen. Adi perli kita erti waktu 1 jam, sungkun kalak si erdahin jadi pemadam kebakaran, adi perlu kita meteh erti waktu i menit, sungkun kalak si pernah terlambat naik pesawat, adi perlu kita erti waktu 1 detik, sungkun sekalok pelari si talu pas nandangi seh i bas garis finish. Jadi kai nge ertina waktu e man banta?

Waktu eme kesempatan si meherga si ibereken Dibata man banta, si arus ipakeken alu mehuli ras ertanggungjabap. I bas makeken waktu e lit strategi-strategi si arus si lakoken, sabap wari-warinta la kap mehuli. Ertina doni enda mereken melala godan man banta, subuk arah pendahin, perduiten, perkadekaden, pertemanen ras sidebanna. Jesus pe sanga italukenna Iblis, alu make strategi, e me ncikep enteguh kata Dibata. La sitik pe IA nggit nilah i bas kata Dibata nari. Amin gia iblis talu, labo ia mundur saja nimai paksa si payo lako naluken Jesus. Ope lenga lit paksana naluken Jesus daramina pengikut Jesus guna italukenna, janah ibahanna jadi temanna. Sura-surana erbahan sada kelompok pemberontak man Jesus.

E me alasen Paulus ngatakensa wari-wari e la kap mehuli, sebab iblis lalap ndarami kesempatan guna nangkap kalak si lolah-lolah, si merhat meter bayak alu dalin si la bujur, si la makeken kesempatan alu mehuli. Pelajaren man banta maka i bas teptep kesempatan ula sirang ras Dibata, i bas pendahinta sekalok-sekalok dahikenlah bagi si ngena ate Dibata.